

四庫全書

集部

欽定四庫全書

集部

梁谿集卷一百六

四至

詳校官庶吉士<sub>臣</sub>張溥

侍讀<sub>臣</sub>孫球覆勘

總校官知縣<sub>臣</sub>

楊懋珩

校對官待詔<sub>臣</sub>

胡士震

謄錄監生<sub>臣</sub>

俞昌言

欽定四庫全書

梁谿集卷一百四

宋 李綱 撰

劄子二

與右相乞罷行交子劄子

辭免轉官與宰執劄子

與宰相乞宮祠劄子

與李尚書措置畫一劄子

與右相乞罷行交子劄子

契勘近承都轉運司公文依准朝廷指揮本路和糴米二十萬石其所降糴本以三分為率約計一分係新法交子二分係金銀勅牒等具交子尚未降到某竊謂交子之法行於四川則為利行於他路則為害四川山路峻險鐵錢脚重難於齎挈故以交子為便當時設法者措置得宜常豫椿留本錢一百萬貫以權三百萬貫交子公私均一流通無阻故蜀人便之近年不椿錢本其法已弊况欲行於他路哉今東南道路安便銅錢脚輕

若欲便民固已不待交子自能流布目今戶部財用窘迫必無數百萬椿畱錢本交子之行止憑片紙民間得之交手相付不敢停畱良民折閱轉賣不得元直十之二三兼并之家賤價停蓄坐享厚利爭競既起獄訟滋多其為害有不可勝言者某大觀間任真州司法參軍兼管常平倉庫是時朝廷推行交子之法豪民挾形勢戶競以賤價得之以待見錢輸納官司不敢不受應係官錢悉是交子其後覺知不便從而改法倉庫見錢為

之一空由此觀之非獨不便於民而官司尤甚今朝廷  
乃欲講究推行誠獻言者之過也伏望鈞慈更加詳察  
特賜敷奏早行寢罷勿待公私已受其弊見不可行而  
後改天下不勝幸甚

辭免轉官與宰執劄子

某誤蒙聖恩特加遷秩尋具奏辭免又奉詔書不允無  
任感懼之至契勘本路近以虔守失於撫循致已受招  
安人嘯聚作過旁近郡縣類多驚擾雖遣兵討捕兇焰

稍衰然以兵將分布不足之故尚多漏網殘黨猶有竄  
伏山林出沒未已者帥司任一路之責何所逃罪今乃  
以盜息民安為名叨冒恩賞何以厭服公議兼某年來  
衰病屢請就閒見患瘡瘍久在假故深慮職事廢弛以  
速官謗伏望平章都督特進僕射相公洞照誠懇特賜  
數陳追寢成命以安愚分仍檢會某累奏除一在外宮  
觀差遣庶幾得脫繁劇漸就休養仰賴庇庥保全晚節  
不勝幸甚

與宰執乞宮祠劄子

某伏以衰病累具奏陳乞罷帥守除一外任宮觀未奉  
回降指揮竊念某憂患之餘誤蒙朝廷付以江西一路  
重寄夙夜黽勉不敢自暇以圖報知遇之萬一自去年  
四月初到任至今年八月終已及一年五箇月適值旱  
歲遵奉聖旨賑濟勸糶以活饑民又依稟朝廷指揮招  
填軍額建置營房修築城池繕治器甲增修官府棚蓋  
倉庫催發錢糧招捕盜賊皆係某逐一躬親措置處畫



心力殫耗幸已就緒今者以病乞身即非別有規避兼  
某近以淮西叛將事宜指陳朝廷措置失當實緣憂憤  
成疾心氣不寧思慮顛錯難以安職伏望平章都督特  
進僕射相公哀矜特賜敷陳檢會累奏罷某江西安撫  
制置大使兼知洪州除授宮觀差遣以養病軀以安愚  
分所有某在任修舉到前件職事釐為六狀已具奏聞  
及中尚書省都督府外伏望鈞慈特賜詳察

與李尚書措置畫一劄子

某竊觀六朝於上流重地必擇名臣為之帥守使自為家計乃能鎮撫一方屏翰王室皆有實效不事虛文私竊慕之故自到豫章以來修築城池為可守計創置營房使兵民不相雜處繕治器甲修造官府倉庫措置財賦蓄積金穀團結軍伍招捕盜賊皆幸稍稍就緒庶幾古人之萬一少副朝廷委任之意今具下項

一修築城池

洪州城池北面尤為闊遠皆係荒閒田地無人居

止又城外一帶盡是漲沙高與城齊可以下瞰城中若欲為可守之計其勢不得不修治因朝廷有感減指揮具奏條陳利害且乞給降空名告勅等得旨給空名告勅五萬貫自去年收買木植燒燬塼甃等至今春興工止是本州廂軍壯城及他州剗刷到兵卒共五百餘人漸次修築至夏末秋初方借寺觀莊夫以助工役日給錢米月有犒設皆大使司辦給並不支用漕司經費至十一月半畢

工為城七百二十丈壕與城等為樓櫓二百二十餘  
坐計七百餘間為城門十有一所計三十餘間器  
具篋籬砲座等併舊城皆一新未嘗調發民戶一  
夫無顆粒分文斂於民者用新磚百二十餘萬口  
皆自置窯燒變及令窯戶高價攬撲皆有數在工  
房可稽考也泰發到豫章日願一登新城按視及  
登新舊城以望漲沙方見裁減利害之不謬

一創置營房

洪州自兵火之後營房並無存者廂禁軍與民雜處不可鈐束兼得朝廷指揮每歲防秋許勾抽本路隸將不隸將兵按閱使喚亦無寺觀屋宇可以屯泊不免建置營屋大使司支錢與諸州收買木植及令諸司根括戶絕拋棄屋宇折移改造置營房三千餘間並係瓦屋除撥付本州廂禁軍逐營外造客軍營房一所五百餘間見今屯泊諸州及步諒軍馬使司工房及洪州工案皆有圖籍具在

可稽考也

一繕治器甲

大使司元降晝一撥兵二萬人自近年以來並撥  
付都督行府及岳飛下去年春乃無一人一騎畱  
者併與器甲軍須一切席卷而去某去歲到官檢  
視甲仗庫空空如也因奏朝廷乞降告勅以漸製  
造督責兩作院嚴其課程又分委諸州製造逮今  
已積三千餘副金鼓旗幟弓弩刀槍之類率皆新

置又以格式造戰船戰車三勝弓合彈弩等皆有  
名色數目在工房願泰發因暇日試閱視之

一建置官府倉廩

洪州素無吏舍止以設廳前廊屋為之難以檢察  
因規度都廳之南造使院三十間以居羣吏卻以  
設廳前舊吏舍分置甲仗激賞營田儀從添賜等  
庫下馬門外舊皆草屋為造房廊數十間收其直  
歸公使庫州學舊未全備為增修兩廊齋舍等五

十餘間大豐倉自兵火後全無屋宇為造新厰八座計四十餘間以貯大使司并常平司米斛前此並無教閱之所為造新兵射廳及閱武堂防城器具之類不可無安頓去處為造東南壁及西北壁防城庫兩所共四十間無館賓客之所為置候參謀宅以充行衙見今賈路分居止皆有數目在工房

一措置財賦



洪州前此財賦所以匱乏者非惟以年凶民貧用  
度廣之故不治其源使之然也諸縣者財賦之源  
置而不問每遇緩急窘迫之際乃召縣令使之甘  
認應副豈非倒置乎某自到任將諸縣合納窠名  
錢一切根刷見名色將本縣合支用之數分撥窠  
名存畱應副外自餘并諸司錢物並令解州次月  
五日前到達限者治之又每季因通判行縣委之  
剗刷以此源源而來不絕官吏軍民請受並按月

排日支給軍衣之類亦前期椿辦不闕月椿錢最為難辦本州應副岳飛月六千餘緡田邦直月一千二百餘緡養申世景兵月九千餘緡凡一萬六千餘緡此皆的確不可闕者今月椿庫常有二三萬緡見管蓋緣中間力申朝廷理會減免每月折帛錢三千餘貫及撥到發運司二分錢及朱墨勘合錢等所以粗有贏餘又每差使司回易官載米斛前去湖北回易兌撥應副岳飛軍中既有利息

又省脚費此不可不知也某去歲初到官日大寧倉米止有四石六斗軍資庫錢止有二百餘貫今錢買米數頗多於前日春衣錢亦已椿下二萬貫幸取倉庫都厯及稟支厯試閱視之

一積蓄金穀

使司金穀頗有積蓄未嘗有毫髮斂取於民者皆係措置回易均節用度收拾失陷所致近交割與權官錢約計七十餘萬緡米計八萬餘石州縣之

數不在是也亦嘗具數申奏朝廷近聞有金字牌撥錢二十萬緡銀二十萬兩金三百兩赴江州樁管聽候朝廷指揮取此猶可若再取即不堪命矣所以積蓄得此錢米者蓋緣每每力申明朝廷若一切委隨則掃地皆盡矣於中米尤可惜去歲初到升百三十秋得一稔升十數文寸積銖累以及此數若不安散以陳易新可以常為洪州之根本非細事也洪州歲用米八萬餘石而所得耗米止

及其半何以支吾此亦須有以處之方欲申明洪州聚三司官吏數倍他州而所得耗米絕少何以能給謂如安撫司漕司官吏自當責辦一路宜於吉撫等州耗米多處約度應副乃為長久之策更在裁度也

一團結軍伍

大使司初有兵二萬人至去年春尚有數千人朝廷撥與岳飛遂無一人一騎畱者某自行在乞得

申世景軍將帶前來纔及千人其後累乞兵於朝廷止是關送都督行府及乞兵於都督行府報云候有警急日遣發然竟無一人一騎來者既而有淮上之捷僥倖少安自今年春以盜賊紛擾之故屢次申陳蒙朝廷差到李貴步諒軍馬各千餘人今秋並勾赴本司教閱以申世景將本軍為前軍賈和仲將諸州起發隸將不隸將兵為左軍任仕安將洪州禁軍為中軍李貴步諒各將本部兵為

右軍後軍共六千餘人團結教閱軍聲粗振然其  
間如申世景李貴步諒之軍多西北人差可用如  
本州及諸州兵但可張聲勢耳此五統制者皆一  
時之選更在有以駕馭激勸之也

一招捕盜賊

本路盜賊虔為最吉撫筠袁次之去年到任之初  
遠方人但聞遣一前宰相為大使意謂統兵必多  
往往戢服其後虔守孫佑邀功生事致虔寇已受

招安者蠶起幾破吉州賴本司遣兵襲逐破之復  
歸巢穴然所遣不過數百人群盜窺見鮮少遞相  
讖學紛紛不已延及撫吉筠袁亦有竊發者所幸  
將士用命招捕一火了當又措置一火方漸衰息  
至秋初得張柔直來守虔州相與商議措置又得  
朝廷差李貴步諒兩軍前來渠魁如周十隆謝小  
鬼等悉就招撫如劉宣熊定李安靜等悉就擒捕  
凡招捕過群盜六十餘火其間每火有至數千人



者皆有人數姓名在刑房亦嘗開具申奏今一路盜賊有名字者悉已淨盡大抵江西民俗獷悍輕生喜亂有仇殺之風全在巡尉得人於其微時用心緝捕無使滋蔓則亦不能為大害也要當使之服業田畝而無科須之擾廼為上策耳

前件八事謾以浼聞亦舊令尹之政必以告新令尹之意幸冀照察

梁谿集卷一百四

欽定四庫全書

梁谿集卷一百五

宋 李綱 撰

狀一

申省乞立價賣告敕狀

申省乞措置盜賊便宜施行狀

申省乞降淮南東西路茶長引狀

申省乞留四色錢數應副洪州起發岳少保大

軍支用狀

申省乞將逃移災傷人戶見欠夏秋稅特行住

催等事狀

申省乞將修城造軍器度牒給降告敕狀

申省乞告敕造軍器狀

申省具截城利便無擾民戶狀

申省乞存留回易酒庫狀

申省乞立價賣告敕狀

勘會近奉聖旨指揮給降到激賞空名承信承節保義

郎告各五道州助教敕三十道度牒二百道未有立定  
價例緣本路監司及諸州軍各有朝廷給降官告度牒  
價例增減不同今來本司勸誘出賣未得伏乞詳酌立  
定逐色告敕等價例降下以憑遵依出賣

小貼子

契勘本司先准朝廷指揮給降官告收糴賑濟米其  
入米人許作官戶理為選限參部注授差遣仍許帥  
司差權職任今來本司所得激賞告欲乞依上項指

揮施行庶幾易於勸誘

申省乞措置盜賊便宜施行狀

勘會本司先畫降聖旨指揮除臨陣出奇事干機會許  
便宜施行外餘並申取朝廷指揮契勘本路旱災之餘  
盜賊竊發甚衆虔寇尚熾如日近據吉州申永新縣等  
處已添五六頭頂計一千餘人某已具奏聞乞差軍馬  
前來措置全然未到若不許便宜從事委是難以措置  
彈壓欲望朝廷詳酌早賜指揮除臨陣出奇事干機會

外措置盜賊特許從便宜施行

申省乞降淮南東西路茶長引狀

契勘本司依奉朝廷指揮置場出賣茶鹽礬鈔引近准  
指揮淮南東西路分合改作長引路分許客人請買兩  
等長引本司尋申尚書省乞給降長引一十萬貫已蒙  
給降到司見行招誘客人算請外竊緣本司節次承准  
朝廷指揮於賣到錢內支錢一十萬貫應副運判逢大  
夫充起綱縻費五萬貫應副都運趙徽學充打船等錢

二萬貫應副洪州收糴軍糧二萬五千貫應副提點鑄錢司充銅本錢已上共計合支撥錢一十九萬五千貫除旋支過一十萬五千餘貫未支八萬九千餘貫緣所管鈔引內廣鹽鈔引已行住罷及礬引少有客人筭請其茶短引只是通本路興販少有客人入納唯是茶長引不住有客人筭請今來正是造茶月分只合要茶長引趁時接續出賣欲望朝廷詳酌速降指揮下都茶場吏行給降淮南東西路兩等茶長引三二十萬貫應副



本司招邀客人入納趁此時月發泄茶貨貴不致有妨客販

小貼子

契勘近蒙給到十萬貫長引內除洪江州興國軍引節次有客旅前來筭請外所有宣池太平州引出賣大段微細徃徃商賈多是就近於建康府權貨務請筭今來所乞長引欲乞以十分為率將四分給洪州

二分草茶引  
二分末茶引

二分給江州興國南康軍

內江州乞一半草茶一半

末茶引興國南康  
軍並乞草茶引

長引應副勸誘入納伏乞早降指

### 揮施行

申省乞留四色錢數應副洪州起發岳少保大軍  
支用狀

據洪州申據通判申具准都轉運衙牒准尚書省劄子  
內奉聖旨指揮專一主管自今年春季為始將每日合  
收經制無額移用錢拘截別項椿管聽候聖旨指揮取  
撥糴買紹興六年分和糴米本錢每月具收到數申除

已依准行下諸縣等處遵依施行外申州及據申備據  
都酒務狀本務契勘除無移用錢窠名外止有日逐收  
到一分經制司錢六分無額上供錢一分提刑司經制  
錢經制司量添糟錢四項窠名見今日逐解赴司法廳  
月椿庫交納應副岳少保大軍支用所是春季內收到  
上項窠名錢數並排日解遣去訖今來所准上件指揮  
撥充糴本錢逐旬解赴通判衙交納椿管聽候朝廷取  
撥本務未審將前項日收經制司四項窠名錢數依舊

解納月椿庫唯復依令來指揮解赴通判衙椿充糶本  
支用申州乞施行申本司乞施行本司契勘洪州逐時  
所收前項四色窠名錢係本州收椿按月起發應副岳  
少保大軍支用今來若行取撥逐色錢充糶本所有合  
起月椿錢本州委實別無合收名色官錢椿發卻致有  
誤軍前指準支贍欲望朝廷詳酌特賜指揮依舊存留  
上項四色錢數令本州逐月收椿起發應副岳少保大  
軍支用免致闕誤

申省乞將逃移災傷人戶見欠夏秋稅特行住催等事狀

勘會本路州縣去歲旱傷內有至甚去處訪聞人戶未經差官檢放租稅以前其間多有先次逃移之人不曾經縣陳訴乞行檢放後來所差檢視官吏不曾將逃移人戶名下乾旱田段依例檢放稅苗以至縣官亦不檢察卻見行催理逐戶名下合檢放稅苗是致逃移下戶不敢歸業荒廢田土轉見失所已牒提舉茶鹽常平等

公事司措置委官體究施行及行下洪吉等八州軍照會更切催督令佐速便先次根括逃移未曾歸業人戶數目將名下去年以前見欠官物並未得催理具數供申去訖本司令契勘災傷人戶依今年三月四日聖旨指揮除災傷及四分以上拖欠紹興四年以前租稅合行除放並依今年三月二十八日聖旨災傷人戶內本戶放稅五分已上第四等已下逃移人戶合納紹興六年夏稅以十分為率每科各與倚閣二分候來年隨本

料送納外所有紹興五年係災傷最甚年分其拖欠殘  
零稅租未有許與減閣明文若行盡數催納深慮細民  
經此大旱力所不及未能輸納理宜存恤今欲乞將逃  
移人戶歸業之人紹興五年戶下未納官物特行住催  
其自餘應係災傷人戶見欠夏秋稅官物各隨料次分  
作三料帶納庶幾上副朝廷寬恤之意

申省乞將修城造軍器度牒給降告敕狀

勘會洪州城壁自經兵火之後本州闕乏至今未曾修

治及城上合置備禦樓櫓戰棚防守器具等事一切並  
無緣本州係一路帥府去處城僻最為急務不可廢弛  
若不措置興修及將濶遠去處裁減不唯漸有摧倒日  
後愈費工力兼合用守禦人兵浩瀚緩急必致誤事本  
司除已一面委本州官檢計合裁減興修工料及相度  
開具緊要受敵之處欲隨宜建立戰棚敵樓計備防守  
器具外已具申奏朝廷乞下所屬先次給降新法度牒  
二百道變轉專充修城使用及近准樞密院三月十三



日劄子仰依都督行府指揮令本司措置招填本路闕額禁軍緩急調發使喚其合用軍器令帥司一面措置造作如有合行事件條具申取朝廷指揮本司尋條具合行事件數內一項契勘帥司以前自造到軍器昨係本司統制官祁超丘贊等軍馬闕借披帶使用其逐項軍兵節次抽摘赴都督府岳飛軍前盡數將帶前去本司器甲見令闕乏令承朝廷指揮合用軍器令帥司一面造作使用如有合行事件條具申取朝廷指揮本司

見開坐名件行下諸州令依應造作所有合用錢物亦已具狀申朝廷特降新法度牒二百道應副支用候將來支絕日再行申請去後未奉回降令據洪州申備准四月二十六日都省劄子具到和糴畫一內一項看詳今來所乞權住給降新製度牒應副其他官司專充糴本四月二十七日奉聖旨依本司契勘所乞給降修城并打造軍器度牒並係指準急要變轉支用不可少闕欲望朝廷特賜詳酌如所乞前項度牒四百道依近降

指揮合權住給降即乞逐急紐折價錢給降官告及助  
教敕牒下本司應副轉變支用所貴不致闕誤

中省乞告敕造軍器狀

契勘本司元降指揮差撥軍馬二萬人逐時造到器甲  
名件數目浩瀚後來軍馬旋次撥赴都督行府及岳少  
保下并器甲將帶前去本司並無見在軍器近蒙朝廷  
及都督行府指揮合用軍器令帥府一面置造支用如  
有合行事件條具申取朝廷指揮本司除已將合置造

器甲弓弩名件數目拋降下諸州軍置造外累具狀申朝廷乞支降新法度牒二百道應副支用未蒙降到如不合以新法度牒應副即乞將官告并助教敕牒準折價數支降庶幾可以趁時置造軍器不致闕誤

申省具截城利便無擾民戶狀

契勘洪州城池自建炎三年十月內經金人殘破之後不曾修治城壁摧毀壕塹堙塞並無樓櫓器具兼城北一帶皆無民居盡是荒閒田土地步濶遠緩急難以防

守今委武功大夫權本路軍馬鈐轄武登相度合行裁  
減自洪喬門至崇和門取直修築新城開墪壕塹卻將  
舊城裁減充防捍江水隄岸又舊城向北一帶自來上  
有漲沙為患幾與城齊難以措置今來存留舊城為堤  
亦可以捍隔漲沙為永久之利檢計到合用工料木植  
磚灰等本司已一面那融兌支錢物計置收買材植物  
料等般造窰務燒變成磚又用磚數多勾到南昌新建  
兩縣窰戶高與價值每一口磚計價錢二十文足令結

攬燒變應副使用及於諸州刷壯城兵士量行差撥及  
本州壯城牢城廂軍等相兼修築又緣工料浩大竊慮  
遲延已將洪州管下縣分應干僧寺道觀有常住物業  
者紐計稅錢量差夫力本司支破錢米貼助修築並不  
調發逐縣人夫亦無一事一件取於民間竊慮寄居及  
過往士大夫不知上項因依但見本州修築城壁便謂  
調發人夫料買物色亂有傳播以為搔擾達於朝廷難  
以辨白今畫到修城圖子貼說次第須至繳申所有本

司累具狀申朝廷乞支降新法度牒二百道充修城使  
用伏乞早賜指揮降下撥還兌支錢物接續支用如不  
合以新法度牒應副即乞將官告并助教敕牒準折支  
降施行

申省乞存留回易酒庫狀

本司據洪州申承都轉運司牒備准尚書省今年正月  
二十一日劄子措置條畫欲行下兩浙江東西路諸州  
軍各權暫添置戶部贍軍酒務一所內見有本州比較

務去處更不創置止就舊務措置開沽於總制司錢內  
就截錢帥府一萬貫餘州五千貫專一循環充本將收  
到息錢與本州經費外餘數拘收應副大軍月椿錢及  
令逐路州軍知通相度於管下富庶縣分興置等事內  
一項所置酒務係專要贍軍支用竊慮置務州軍別有  
回易等酒庫侵奪課利除都督府見置激賞酒庫外其  
餘一時許置回易酒庫並自開沽日住罷奉聖旨並依  
本州除已遵依施行外申本司所准前項指揮於諸州



添置戶部贍軍酒務收息專充應副大軍支費朝廷設  
意欲寬民力極為利便契酒洪州見有係省酒務兩所  
內東酒務係舊比較酒務本州見行遵稟將本務見在  
酒數撥入都酒務趨辦課額截撥總制司錢回買所有  
麴米關借槽仗什物等就本務興置外竊緣安撫制置  
大使司自置司以來畫降聖旨許置回易遂行措置以  
回易錢起置回易酒庫循環作本造酒變賣收息應副  
本司諸般支用自起置回易酒庫今已累年即不妨洪

州省務趨辦課額所有本司逐時按閱軍兵遇有調發  
犒設激賞按月供給使臣及一司公吏請給并紙劄等  
造作軍器收買物料支給工匠雇直應千百色支費至  
廣全仰上件息錢支使所有本司見置回易酒庫今來  
若行住罷即頓闕錢物應副上件官吏兵將等百色支  
用不免上煩朝廷支降緣本司回易酒庫與洪州酒務  
及今來所置贍軍酒務措置得宜自各不相侵奪沽賣  
得行可以趨辦及額兼本州管下諸縣內除南昌新建

兩縣係倚郭及靖安一縣係山僻小邑外自餘分寧武  
寧兩縣係舊有比較酒務去處豐城奉新進賢三縣亦  
各戶口稍衆人煙翕集皆可興置贍軍酒務收息補助  
月椿錢物定須饒行除已行下本州竭力相度措置外  
欲望朝廷詳酌特降指揮許依舊存留本司回易酒庫  
庶幾兩無相妨不廢一司用度緩急不致闕乏上煩朝  
廷實為永久之計

梁谿集卷一百五

欽定四庫全書

梁谿集卷一百六

宋 李綱 撰

狀二

申省相度吉州將兵狀

申省應副張龍圖米等狀

申省乞施行糴納晚米狀

申省措置酌情處斷招降盜賊狀

申省陳述受納夏稅物帛狀

申史館承受元帥府御書狀

申史館繳編次到建炎制詔奏議表劄集狀

申省相度吉州將兵狀

准樞密院劄子尚書省送到權發遣吉州李彌遜劄子  
契勘本州逐年起發上供錢物米斛居江西一路之半  
若無盜賊侵擾即易為應辦緣本州與虔州接界盜賊  
衝突無時嘯聚徒黨動是數千窺伺州城正緣本州土  
城不堅纔經連雨又多倒塌不可防守兼軍兵人數不

多雖有逐縣巡尉多是怯懦之人不能禦敵所部弓兵  
人數亦少是致州郡無以隄防方其於平時補治城壁  
招練軍民不惟別無錢本支用又有搔擾生事之嫌若  
緩急旋行措置委是無及以此例皆循習不敢舉行遂  
致廢闕每遇盜賊警急以至殘破州縣皆拱手坐視如  
日近虔賊謝小鬼等八頭項約四千餘人衝突侵犯逼  
近州城殘破吉水永豐兩縣為害甚大今相度到合行  
事件若蒙特賜施行即於朝廷別無窒礙而使一路歲

入不致虧欠一州人民不致傷殘實為利便開具畫一  
於後一去年二月內准本路馬步軍都總管司牒備准  
樞密院劄子於吉州添置禁軍兩營通舊滿二千人牒  
州相度供申昨為諸縣災傷乞候豐熟日措置彌遜契  
勘本州別無禁軍名額止管一千人係於虔州東南第  
六將下分撥前來委是不多緩急無以捍禦今相度本  
州可以添置兩指揮禁軍一千人不隸將下專一准備  
州界急切討捕盜賊不許差出亦不許諸司抽差使喚



如允所乞其招軍例物請給等並乞依東南第六將上  
等禁軍則例其餘合行事件別具申請施行一本州見  
管將兵一千人將官在虔州駐劄雖許差本州兵官一  
員兼訓練緣兵官職事繁冗不得專一契勘本州有見  
任準備將領一員係注差材武人每季詣諸縣教閱弓  
手一次職事大段簡省欲乞令兼管統轄訓練將兵如  
蒙朝廷許依彌遜所乞添置不係禁軍一千人亦乞就  
令統轄訓練將兵兼自來盜賊竊發會合巡尉弓兵仍

乞將州界內巡檢土兵就令將領統轄教閱庶幾緩急有所統一可以用事伏候指揮小貼子稱契勘見今正是盜賊擾攘之際與平日事體不同若下省部勘當定是拘礙常法有害隨宜措置欲乞斷自朝廷量度如彌遜所陳委有利便伏乞特降指揮施行伏候指揮劄送本司限三日相度申行在樞密院契勘吉州近年多有羣盜侵擾蓋緣本州永豐縣係與虔州興國縣抵界素多盜賊巢穴去處本州龍泉安福永新袁州萍鄉縣又

與湖南界分相連接山林深遠為盜賊淵藪出沒之地  
近來湖南每有盜賊作過或被官兵逼逐亦是侵入吉  
袁州管下作過良民被害不得安業其逐州各合屯兵  
專切彈壓防扼緣本司關兵差那前去今來所准前項  
指揮除吉州所乞創置軍額不隸諸司使喚等事理難  
施行外本司今契勘本路所管東西第六將兵一十指  
揮每營額置五百人別差部轄將校一十人共額管五  
千一百人內八指揮并正副將官部押隊使臣係在虔

州駐劄兩指揮在吉州駐劄其虔州本將截日總見管  
止有二千八百四十七人計闕二千二百五十三人係  
闕額兩指揮已上本司令相度欲於虔州八指揮將兵  
內將兩指揮闕額最多處併填見闕一般軍額或等仗  
請受同處軍分營額卻那已撥併兩指揮闕額軍分一  
千人就吉州招置所有合要部轄人且令吉州於舊管  
將校等內權行選差兼管部轄候招到人數稍多具合  
用人數申帥司於虔吉兩州通行取補將校管轄及於

虔州那撥副將一員前來吉州駐劄同共措置招刺訓練候招置及教習事藝稍成次第即從帥司體度吉袁兩州有盜賊自來出沒作過縣分量行分屯彈壓捍禦所有招軍例物合用錢糧衣賜仍乞下轉運司契勘科撥應副委是利便更合取自朝廷詳酌施行

申省應副張龍圖米等狀

契勘本司去年蒙朝廷指揮許隨宜措置帶糴米斛每正苗一石帶糴二斛截自指揮到日為始至今年下限

蒲共帶糴到占米等二萬三千餘石已告示諸縣有米帶糴人戶及未納零數並與住罷將帶糴米依時直紐錢價通計三萬餘貫已行下逐縣將人戶合納應於官錢給鈔銷折本司卻支撥錢代納去訖近據新知虔州張醫申本州錢糧大段闕乏到任之初實難措置本司兩次於前件帶糴米內撥米八千石應副前去外猶有其餘米斛見椿管充本司准備軍期緩急支用

申省乞施行糴納晚米狀

據洪州申准轉運司牒備奉朝廷指揮今歲和糴大米  
五萬石內先糴一萬五千石並限九月終糴足起發前  
去張少保軍前緣本州管下諸縣民田多種早占少種  
大禾其所種大禾係在向去十月方始成熟民間並無  
蓄積陳大米即與其餘路分州軍事體不同今來秋田  
闕少雨澤已覺亢旱見在差官分頭祈禱尚未感應若  
以等候大禾成熟日收糴竊慮有違九月糴足起發元  
限本州亦未敢趁時收糴早占米斛已申轉運司乞賜

申明朝廷施行外申本司并承轉運副使徐顯謨公文  
契勘近准六月二十八日尚書省劄子指揮上供米斛  
係充軍糧早米不堪久貯其合起應副行營左護軍湖  
北京西宣撫司早米二十萬石不須更催早米如人戶  
願以舊米豫納即行受納起發即不得催理早禾以此  
本路和糴米斛並合收糴粳米內先糴一十萬碩本司  
已於七月十六日牒諸州照會收糴舊米外其餘米九  
月開場自合收糴晚米申本司契勘本路春夏之間雨



賜調適早禾已是成熟收割了當自入秋以來闕少雨  
澤已覺亢旱又生青蟲食害苗稼見今祈禱未獲感應  
若更旬日內無雨晚田決致旱傷竊見朝廷近降指揮  
受納秋苗及和糴米斛並要一色晚米竊慮既不糴納  
早米晚稻又失指準有誤大計已具奏聞乞賜朝廷詳  
酌施行去訖今據洪州前項申述本司契勘本州管下  
鄉民所種稻田十分內七分並是早占米只有三二分  
布種大禾又緣入秋以來久闕雨澤已見亢旱竊慮晚

田向去難以指準其早米官中既不糴納慮為兼并之家停蓄及他路客販前去有誤歲計欲望詳酌早賜指揮施行

申省措置酌情處斷招降盜賊狀

契勘官軍自來討捕盜賊有招降有脅降雖同謂之降而事體全然不同或聚集徒衆官軍未易敗獲或保固險阻官軍難以攻取遣人齎發旗牒入賊說諭供伏款狀聽從號令解釋器甲束縛槍杖依限出參有悔過自

新之意此招降也招降則當免放從前罪犯一切不問  
首領量補官資徒黨揀選使喚待之與諸軍一等若或  
官軍已臨賊陣決可擒獲及與官軍已入賊巢逃避無  
所乃始祈哀乞降保全性命出於事不獲已此脅降也  
脅降則當以便宜酌情處斷其有久為頭首累受招安  
長惡不悛及殺人衆多情理巨蠹之人自合依舊處死  
及有隨隊劫掠不曾殺傷之人合從斷配若是驅虜入  
隊為賊負荷不曾劫掠作過之人合從釋放上項脅降

即難與招降一例放免今來本路前後脅降到賊並不分別遂致兇徒無所懲戒方其嘯聚徒黨初謀作過之時已謂官中必須招安可無後患恣情刼掠無所忌憚及至官軍圍掩不能自免又使出降給據放散安然無事至有朝受公據散歸田里暮持槍杖放火殺人遂致兇徒遞相倣倣一火纔了一火又生無有窮已本司今將近來討捕到賴滿八揚三十四熊清李安淨等諸項賊火徒黨內有脅降之人用所得便宜指揮依前項措

置酌情處斷外依乞更賜詳酌如得允當即乞指揮行  
下見有盜賊諸路帥府依此施行庶幾事歸一體盜賊  
有所懲戒漸見衰息

申省陳述受納夏稅物帛狀

竊見行在戶部帖本州受納夏稅物帛官將受納到應  
于夏稅物帛數目開具實封申尚書省仍候將來受納  
了畢即別行攢類親書都數結罪保明供申契勘依法  
夏稅受納開場日縣申本州州申轉運司點檢及納畢

申所屬監司選官稱量合係上供之類即團併成綱發赴左藏庫交納內有合係本州支給官兵春冬衣賜等用即從本州支遣皆有賬籍可以稽考此祖宗舊制不可易之法也今朝廷盡廢前法令戶部徑帖州縣受納官令開具受納數目徑申尚書省則是朝廷平時所設監司帥守皆不可信而取信於州縣小官廢成法而失大體非所以示天下竊為朝廷惜之以愚意竊料此必戶部建明欲盡取夏稅物帛以足用度而不恤州縣官

兵支費此尤不可者近年州縣米斛悉充上供錢物悉  
養大軍窘匱甚矣若更盡取夏稅物帛將春冬合給官  
兵衣賜令州縣自行擘畫措置委是難行伏望朝廷特  
賜詳酌指揮施行外所有戶部帖下本州受納物帛官  
朝旨未得施行別聽朝廷指揮

申史館承受元帥府御書狀

准史館牒勘會本館見修纂建炎日厯合要元帥府事  
跡參照修入契勘元帥府昨在濟州日曾以書賜李相


公即未見得係於何年月日於甚處承受及有無謝表  
須至公文牒請詳此契勘前項文字請抄錄送史館以  
憑修纂契勘某昨於建炎元年五月內自資政殿大學  
士太中大夫領開封府事蒙恩除尚書右僕射兼中書  
侍郎於南京行在供職據從事郎劉默狀申四月內承  
元帥府差齎親筆書往湖北路等候投下行至德安府  
聞自江淮間前來却齎親筆書回某是時實於南京承  
受有表稱謝所有謝表今錄白繳連在前



申史館繳編次到建炎制詔奏議表劄集狀

右某近承史館牒當館見修纂建炎日厯合要時政記  
參照昨蒙朝廷降下觀文相公省記到建炎初任宰相  
編類到時政記內文字首尾未詳及拜罷辭免奏劄批  
答並未曾抄錄赴館并靖康初淵聖皇帝即位事迹亦  
未曾編類前來守等參照某契勘除靖康初間淵聖皇  
帝即位事迹不曾被旨未敢編類外今將自建炎初除  
罷宰相制命詔書批答辭免稱謝表劄及奏議建明劄

子皆已得旨施行者編類次第勒為四卷繕寫成冊繳  
申史館用匣複盛貯鎖鑰全伏乞照會收管施行



梁谿集卷一百六

欽定四庫全書

集部

梁谿集卷一百

七至九

詳校官庶吉士<sub>臣</sub>張溥

侍讀<sub>臣</sub>孫球覆勘

總校官知縣<sub>臣</sub>楊懋珩

校對官待詔<sub>臣</sub>胡士震

謄錄監生<sub>臣</sub>俞昌言

欽定四庫全書

梁谿集卷一百七

宋 李綱 撰

狀三

申樞密院乞施行劄子差兵將狀

申都督府乞差撥軍馬狀

申督府密院催差軍馬狀

再申督府密院催差軍馬狀

申督府密院相度措置虔州盜賊狀

申督府密院乞防秋軍馬狀

申督府密院具虔吉盜賊再乞防秋軍馬狀

申督府密院開具松江州縣合控扼去處乞軍

馬防守狀

申樞密院乞施行劄子差兵將狀

契勘某近赴行在進對具劄子奏乞依元降畫一指揮  
先次旋差一半兵一萬人其要用錢糧亦乞依元降指  
揮先次支撥一半錢二十萬貫米七萬五千石應副續

准樞密院二月二十九日劄子已關送都督行府劄某  
照會今已多日未奉回降指揮江西係上流重地非屯  
重兵緩急何以控扼兼虔吉州盜賊乘此荒旱嘯聚作  
過自三月以來已添六頭項約一千餘人若無重兵彈  
壓討捕定是猖獗將來難以殄滅右謹具申樞密院伏  
乞早賜指揮施行

申都督府乞差撥軍馬狀

勘會本司近為所管統領官丘贇人馬已依奉聖旨發

遣權聽岳飛使喚蒙朝廷撥到申世景軍馬人數不多  
近據吉州申永新縣等處有盜賊六頭項計一千餘人  
闕兵分頭措置已具因依奏聞乞於近便處先摘那兵  
將二千人付某相兼使喚未奉回降指揮今來虔州界  
尚有未獲賊火不少因統制官李山為岳飛勾回又復  
出沒作過續又據南安建昌軍袁州等處申見有兇徒  
結集嘯聚劫掠村鄉火數漸多須至申聞者右契勘本  
路虔吉州平日素多盜賊聞大軍到來討捕便即遠遁

潛伏山谷官兵纔退又復出沒近蒙都督行府遣副總  
管康隨及差岳飛下統制官李山領兵收捕雖節次承  
關報殺敗火數未能勦除淨盡李山軍馬既回又復猖  
獗今來本路只有某帶到申世景一項軍馬人數不多  
除已分遣一半前去吉州捉殺外自餘官兵見留洪州  
帥府彈壓所有其他州軍見作過盜賊委是闕兵分頭  
前去措置討捕旱歲饑民易為嘯聚若不乘早措置漸  
致滋蔓後來難以殄滅伏望詳酌日下於近便處先次



摘那差撥兵將三二十人付某相兼使喚庶幾不致誤事

申督府密院催差軍馬狀

准樞密院四月五日劄子節文本司奏吉州管下有兇賊郭少二等賊徒嘯聚作過乞先次差撥兵將二千人前來相兼使喚及乞存留岳飛下統制官李山軍兵在虔州彈壓措置等事奉聖旨令都督行府相度應副劄送本司照會須至申聞者右勘會本司見據提刑司虔

吉州南安臨江軍等處申報虔州界有曾六冠曾大喉  
黃鰲鑽曾九唐四謝鬼七周誠梁玩李洪劉宣吳添廖  
一長劉十二譚十二等吉州界曾太保尹使者郭少二  
周花八譙花三易十二羅大等南安軍界何少七吳守  
傅李收等臨江軍新淦縣管下有已受招安鄒烏八等  
賊徒結集頭項人數不一猖獗作過乞兵討捕本司已  
委本路副總管康隨將帶存留丘贇下將官王彥官兵  
三百人前去就節制東南第六將兵及巡委措置招捕

虔吉南安軍管下盜賊并分遣申世景下官兵二百人  
前去臨江軍新淦縣與本縣知縣右奉議郎趙不華商  
議同共捕捉鄒烏八等賊徒外見存軍馬彈壓一路數  
目尠少其李山一項軍馬又已抽回赴岳飛軍前緣今  
來作過盜賊頭項數目委是闕兵分頭前去捉殺竊慮  
諸處盜賊見得官軍單弱結集滋長卒難勦除伏望鈞  
慈詳酌今來所陳事理速賜指揮於近便處摘那差撥  
兵將三二千人付某相兼使喚并支撥錢糧等庶幾不

致誤事

再申都府密院催差軍馬狀

契勘本司先為吉州管下有兇賊郭少二等賊徒作過  
遂具狀申奏朝廷乞先次摘那差撥兵將二千人前來  
相兼使喚及乞存留見在虔州駐劄岳飛下統制官李  
山軍馬具在本州彈壓措置候朝廷別差到軍馬即令  
起發去後續准樞密院四月五日劄子奉聖旨令都督  
行府相度應副本司尋契勘近又不住據提刑司申虔

吉州南安臨江軍等處虔州界見有曾六冠曾大喉黃  
鰲鑽曾九唐四謝鬼七李洪劉宣吳漆廖一長劉十二  
譚十二等吉州界曾太保尹使者郭少二周花八譙花  
三易十二羅大等南安軍何少七吳守傅李收等臨江  
軍新淦縣界有已受招安鄒烏八等賊徒結集頭項人  
數不一猖獗作過乞兵討捕本司已委本路副總管康  
隨將帶存留丘贇下將官王彥官兵三百人前去就節  
制東南第六將兵及巡尉措置招捕虔吉州南安軍管

界盜賊并分遣申世景下官兵二百人前去臨江軍新  
淦縣與本縣知縣趙不華商議同共捉殺鄒烏八等賊  
徒外見存軍馬彈壓一路數多尠少其李山一項軍馬  
又已抽回赴岳飛軍前緣今來作過盜賊頭項數多委  
是闕兵分頭前去捉殺竊慮諸處盜賊見得軍馬單弱  
結集滋長卒難勦除本司已於四月十九日具狀申樞  
密院及都督行府乞於近便處摘那差撥兵將三二千  
人前來相兼使喚并支撥錢糧等庶幾不致誤事去後

未奉回降指揮須至再具申聞者

右申樞密院及都督行府伏乞檢詳本司前申及今狀  
事理速賜指揮施行

申督府密院相度措置虔州盜賊狀

七月十八日准樞密院七月一日劄子臣寮上言臣竊  
以虔州地險民貧風俗獷悍居無事時羣出持兵私販  
為業自軍興以來嘯聚為盜招捕殆將十稔終未殄滅  
臣深求其故乃知招安之後田業荒蕪耕種不具州縣

救目前之急不暇存恤又督逋負宿惡乘之相煽愈固  
加以巢穴深遠山多瘴癘官兵憚於窮討有司疲於供  
億往往以招安為便殊不知官其首領餘衆何歸朝廷  
若不嚴行措置異時鄰境悉因相率從賊患益滋矣臣  
愚過計欲乞汀州常屯兵千人循梅州各屯千人虔州  
屯二千人間歲更番每遇猖獗併力掩殺仍擇守令專  
意撫存失業之人如此則良民有以自存頑民知所畏  
憚庶幾兵可彊而寇可銷矣俟其平定瑞金乃於諸邑上



流增以軍使之額邑宰兼之留屯千人委帥司撥差本  
州將兵四百人他州六百人陰防其微選驍將主之庶  
制其命俾不復萌意實永遠之利也取進止奉聖旨令  
李某連南夫張致遠相度申樞密院劄送某疾速施行  
某契勘虔賊舊年止是冬月農隙之時相率持杖往廣  
東販鹽以圖厚利後來漸次於循梅等州村落間劫掠  
得牛畜錢帛歸家使用巡尉不敢誰何徒黨漸衆遂犯  
州縣至建炎四年宮省移在虔州陳大五長嘯聚作過

當時官司措置無策賞罰失當土豪有物力之家往往  
嘯聚結集報復讎怨頭項漸多州縣不能制禦連結滋  
蔓以至今日雖遇豐年亦不衰息其說有二一則度民  
賦性獷悍喜於為盜易為結集動以千百為羣互相劫  
掠凌逼州縣不畏刑法不顧死亡循習成風不以為怪  
異於諸路盜賊二則自近年以來專務招安官司失於  
措置有以誘之為盜謂如招安到賊火首領盡補官資  
放散徒黨其徒黨中桀黠者又復糾集徒眾自為頭首

以俟招安復得名目遞相倣倣無有窮已其招安出首  
領雖已補授官資或與差遣多是不離巢穴不出公參  
依舊安居鄉土稍不如意或資用闕乏則又相率為盜  
以此滋蔓雖痛遭屠戮亦不改悔竊恐為患未艾今來  
朝廷欲措置虔寇不過招捕兩事臨以重兵有以制其  
死命然後可以招撫務令措置合宜乃為得策何謂臨  
以重兵有以制其死命今虔寇巢穴多在江西福建廣  
東三路界首置立寨柵為三窟之計一處有兵則散往

他處官軍既退則又復團聚中間遣發軍馬卒不能窮討正以節制不一之故若節制歸一使其不能散逸且捕且招威令既行則窮寇別無他策必須自歸然後結以恩信使之改過自新將為首及徒黨桀黠之人盡赴軍前使用以除後患此最策之上者某昨曾陳請乞於江西路置都統制一員節制三路軍馬以招捕虔賊蒙朝廷許令本司辟置然至今未敢辟者非惟難得其人亦以本路軍馬單弱不足以副都統制之名故遲留至

今如蒙朝廷遣發防秋軍馬使本路兵勢稍壯方可辟  
官充上件差遣使統三路之兵以措置虔寇數月之間  
必見就緒既以兵力招降乃可使之遠去巢穴以消永  
久之患應招安到賊穴除放散脅從羸弱之人外其頭  
首及強壯桀黠之人並令解發赴軍前使喚頭首與補  
正官資及其餘強壯人並與刺手背分隸諸軍下使喚  
若能用命立功優與旌賞或有作過必殺無赦其不能  
悛改逃亡復歸本土之人許諸色人捕斬籍沒田產編

配妻子以係累其心使知為盜之無益自然不敢復為  
頭首則虔人喜為盜之風漸次可銷昨韓世忠既破范  
汝為其頭首及強壯人並將帶隨軍前去所以建州數  
年無盜賊之虞者正以措置得策至於盜賊衰息之後  
又須縣令得人勞心撫字使作過桀黠之人既去良民  
得以復業安於田畝乃可以化盜區復為樂土此尤不可  
後也某昨嘗奏請辟置虔州縣令已得指揮許辟然至  
今猶未敢辟奏者實以虔之諸縣多是瘴煙之地盜賊

出沒不常朝廷初無賞格士大夫之有材者多不願就  
又難強之使行今吏部注授者既不肯赴任見任者又  
皆欲省罷欲其究心職事撫字遠民消革盜賊之風未  
易可致欲望朝廷優立賞格將來辟置知縣到任半年  
盜賊稍除良民復業選人特與改官京朝官與轉行一  
官候任滿日各再與轉一官其盜賊平定之後量與蠲  
免租稅已前欠戶並免催科廢幾官吏盡心民庶安業  
復有承平之象所有乞將虔州屬邑分置軍壘屯兵一

節見行相度別具供申外謹具中樞密院都督行府伏  
候指揮

申都府密院乞防秋軍馬狀

准諸路軍事都督行府七月二十九日下本司劄子節  
文本司申乞截留王彥軍馬就便聽本司節制使喚於  
汾江屯駐防扼及分兵前去虔吉等州捕盜等事勘會  
王彥見病昨已准聖旨指揮令統率軍馬前來行府應  
副沿江使喚候將來到日量度分撥官兵前去如緩急



本路別有寇偽警報行府即遣發大軍前去措置捍禦  
劄本司須至申聞者右勘會本司昨累具狀申都督行  
府乞差撥軍馬來本路防秋及分布捉殺見作過盜  
賊使喚先准都督行府劄子見議遣兵及續准指揮已  
勾王彥軍馬候到行府日即差撥前去本司又再節次  
具關兵因依申行府乞截留王彥就便聽本司節制分  
布使喚今准前項指揮本司契勘今來已是九月防秋  
之際沿江一帶合行措置控扼去處並未有兵備若候

有寇偽警報方行遣發軍馬前來應設防捍深恐後時  
決誤國事欲望詳酌速賜指揮差撥兵將前來本路沿  
江一帶擺布防捍使喚庶幾不致臨時誤事

申都府憲院具虔吉盜賊再乞防秋軍馬狀

據吉州申據下班祇應徐彥時百姓徐二黃永經州陳  
狀八月二十九日早據百姓黃永引到吉水縣五十一  
都稅戶徐二稱今月十七日夜有虔賊王三將朱十一  
將等二十三人各有衣甲鎗刀叉刀等投徐二家令本

人探本州有無大兵欲報讎殺本州官員擄掠人民等事尋差人前去徐二住處地名桐木塘離州城五里以來收捉到賊人劉大王太名方龍十朱五陳花十一并殺獲到首級兩級勘據劉大等招通委是同興國縣賊首王四閑等為探得駕動及本州無人馬節次前來徐二家要二十日夜往李十二等家打劫了後就便過江往城下報讎殺本州官員人民放火擄劫財物本州已將劉大王太名方龍十朱五陳花十一處置訖申本司又據

吉州申近據永豐知縣申虔州興國縣賊徒欲侵犯本  
州管下劫掠作過又據吉水知縣申八月二十五日據  
孫勝告首虔賊姓晁等人四散會得二百餘人前去吉  
州作過本州已差發官兵捕捉續據吉水縣弓手徐堅  
等與本州監梅林渡使臣廖文寬等節次獲到孫勝告  
首結謀虔州將兵晁清等九人已送下右司理院根勘  
至二十七日又據太和縣尉張迪功申據土豪蕭安世  
申傳聞興國縣招安人張細髻等因緣手下人盜去王

家牛與財主鬪敵各有殺傷再集周十龍謝二十八花張大閑呂寶等三千餘人在彼圍定王家寨興國縣尉見在彼勸和因依州司已行下興國縣接界永豐等縣差發巡尉體探把截限備外緣所管弓兵人數不多竊慮晁清等走散殘黨或興國縣張細髻等嘯聚羣衆不測衝突本州管界作過衆寡不敵難以支吾臨時申請不及乞差兵前來本州駐劄討捕須至申聞者右本司已累具狀中都督行府乞差撥軍馬前來本路防秋及

分布捉殺見作過盜賊使喚去後未奉指揮差到今據  
吉州中體探得虔州管下張細髻等結集作過乞兵討  
捕緣本司止管統制申世景一軍人數不多委是闕兵  
分撥前去措置欲望朝廷特賜詳酌早降指揮施行謹  
具申都督行府及樞密院伏候指揮

中督府密院開具浚江州縣合控扼去處乞軍馬  
防守狀

契勘本路西接湖北東連江東北與淮南對境去偽地

不遠沿江州縣渡口險隘去處自來防秋皆合行措置  
控扼前此數年本司蒙朝廷撥到兵二萬人可以分布  
使用如江州興國軍皆屯重兵武寧分寧諸邑亦有軍  
馬近日兵將盡皆撥隸都督行府及岳少保軍中所存  
無二十分之一今來秋氣已深應合控扼去處並無兵  
可以防守雖朝廷遣兵屯戍淮上可以保障然預備不  
虞兵家常理亦本路近年舊例不可頓闕若沿江三州  
軍有兵可守緩急別無踈虞則其餘州縣皆可保全所

有防守雖合用兵數至多今來止望朝廷依累降指揮  
量行差撥五七千人本司隨宜措置庶幾不致闕事今  
將浚江州縣渡口及險隘合行屯兵控扼去處畫圖貼  
說繳申朝廷都督行府乞賜指揮差撥應副施行今開  
具下項

一浚江合控扼州軍

洪州

江州

興國軍

一浚江合控扼縣分



洪州武寧縣

洪州分寧縣

江州瑞昌彭澤縣

江州湖口縣

興國軍通山縣

興國軍大冶縣

一合控扼險隘

武寧縣界狗咬口

瑞昌縣界泉口

一合控扼渡口

李家渡

馬家渡

富池口

洪雪洲

磁湖

右謹具申樞密院都督行府伏候指揮

梁谿集卷一百七

欽定四庫全書

梁谿集卷一百八

宋 李綱 撰

書一

與了翁書

與吳元中給事書

與許振叔顯謨書

上王太宰論方寇書

上門下白侍郎書

與了翁書

某頓首拜啓提宮右司文座下曩歲姑蘓獲奉誨語迨

今六年不果通問執事第勤瞻詠今者罪譴幸託仁里  
因得詢問動靜竊承寓居廬阜之側燕居甚休殊以為  
慰暑溽比日不審體氣復何似伏惟尊候萬福某學識  
淺陋荷上眷知擢處華近每愧無以補報萬一愚戇妄  
發罪當誅殛上恩寬大不忍寘之斧鉞姑從薄謫且得  
善地省咎念恩日深慚懼沙陽去鄉里不遠而溪山之  
勝魚稻之饒為七閩最士夫漸先進之風多可語者罪  
戾得此大過所望非幸會耶且置是事疎拙之性惜不

辦理惟是平日為信釋氏因循倥傯常恨未能徧讀其  
書逮抵茲邑征商粗辦居多暇日適羅疇老修撰雜創  
藏典緣事甚盛因與二三禪老結看經社以酬宿昔之  
志良自喜也然華藏廣博初心乍遊浩無涯涘譬猶泛  
海不觀斗杓豈能了知所適之方而到彼岸竊聞吾丈  
留心藏教有日矣以巨眼而閱靈文必有所深契者方  
此待罪筦庫無緣趨造函丈以承緒餘願因便風略示  
其要以為華藏指南則善財之參豈待南歷達摩之旨

不從西來自利利他以所得者還為人說亦佛菩薩之意也近於陳麟宣教處見華嚴閣記融事理為一門會禪教為一法仰味至言深所歎服新著必多儻蒙垂示一二以為後進發藥之資不勝幸甚拙惡四篇輒覽聽覽以丐斤削正暑伏冀為道自重五月十一日某頓首拜啓

與吳元中給事書

某頓首拜啓元中宮使給事台座使人至伏領春初所

賜教玩味再四如奉言色不勝感慰中夏暑溽不審比  
日體氣復何似恭惟台候萬福某待罪沙陽行半年矣  
省咎念恩日深愧懼所幸征商職事粗辦日有餘暇適  
羅疇老修撰新創藏典因與一二禪老結看經社撮其  
樞要隨即錄之此外間亦弄文墨以自娛適士人中有  
鄧肅者頗有俊氣時與酬唱以盡溪山風月之美用是  
不覺歲月之度第親年浸高遠去庭闈數千里外此情  
如何蒙諭周悉非眷念之厚何以及此感服無已竊聞



復職計召還不晚矣中外所望非特拙者有覲於庇賴也達可北門之除頗協士論近道維揚相會必歛其論如何信斯比報宮祠果能就閑完養數年甚善不知卜居何地因書幸致意未果修問見素纔得從官遂爾物故人世浮脆如幻如夢無可戀着觀此益使人灰心耳如人飲水冷煖自知如人登山各自努力嘗以此語獻于左右願留意近著八篇輒錄去以發千里一笑有未然者幸以見教未有瞻晤之期惟冀為道為民自重謹

奉啓承動靜五月二十八日某頓首

與許振叔顯謨書

某頓首振叔知府顯謨尊兄專人來特辱教賜殊荷眷  
意竊審郡事多暇為况甚休尤慰瞻跂比日暑溽伏惟  
台候萬福某待罪貶所託庇如昨征商之餘日得觀閱  
藏教留心空門以洗三十八年之非此外頗亦繙經史  
弄筆硯聊以自慰邑官為具舫構閣以盡一邑溪山之  
勝時時登臨一觴一詠有足樂者士人中有鄧肅者頗

俊爽間與酬唱有鄧覲者其家好士喜具盤饌有鄧密者喜種花雖殊方絕域者圃中色色有之時以來供有陳漸者深於經術議論淵源可聽而疇老修撰晚年畱意內典不為今之禪流莽蕩不可窮究葛藤戲論家有園池竹木森然時得遊從其間清談終日觀此數事豈復有流落之歎第親年高矣遠去庭闈未有歸期此懷何已異時儻蒙恩貸得歸養親當遂屏跡山林以求素志幅巾杖屨同為惠山之遊以畢此生第恐振叔方為

世緣挽留未暇從我耳如何吳元中近得書趣尚可喜  
昨過維揚相會差欸否何深之知比經從去冬道姑蘇  
邂逅虎邱為一日之欸歷落如故同時放逐已有得宮  
祠者非久可還否見素纔得從官便入鬼錄人生如此  
亦可觀矣雖有久近竟亦何較今人但知營營以厚其  
生初無一念以善其死溘然之後平日所耽戀者無一  
可得而所造諸業隨念現前散入諸趣可不懼耶用是  
益知空門真所依歸者振叔畱意於此久矣頃雖欸會

因循未能深叩所以有可垂教願無吝焉近文四篇謾  
資一笑正暑切冀為時自重揮汗布此殊不周謹五月  
二十八日某頓首

上王太宰論方寇書

宣和三年正月日某頓首再拜少保太宰相公閣下某  
愚陋無取昨者誤蒙識擢備員左史侍清光者幾一年  
常愧無以補萬分之一妄論水事罪當誅殛上恩涵覆  
不忍寘之斧鉞姑從薄謫夙夜循省感懼交深今茲又

緣赦宥與牽復之列獲遂歸養仰戴天地父母之賜銘  
鏤肌骨未知死所此蓋伏遇太宰相公以道佐天子務  
崇寬大洗垢滌瑕許之自新致茲狂狷亦與甄錄佩服  
盛德何敢弭忘某自去冬承吏部符罷任起離閭中將  
道浙東省親毗陵行次上饒適聞睦州方寇猖獗道路  
不通遂由江東泛舟以歸又值黥歙失守郡縣驚擾間  
關險阻獲達金陵出於天幸然某遲迴饒信諸郡者凡  
兩月餘於方寇事親見探報及得於傳聞實為詳悉日

夜慮之至熟竊不勝憤懣深懼州郡部使者不以實聞  
朝廷設有奏報不過告急乞兵為自完之策拘於吏文  
陳迹不盡至於東南大計與夫破賊之謀初未嘗及也  
恭惟相公得君當國以身任天下之重而某平日荷知  
遇之厚不後他人輒敢具所聞及區區管見冒昧鈞聽  
伏幸裁察方寇初作據邦源村地枕歙睦之境怙險憑  
阻脅從烏合之衆不過千餘人耳當是時江浙屯兵要  
害之地以強弓勁弩守之使虜掠者不得出從亂者不

得入不旬月間糧竭衆離賊可談笑縛也統兵於浙者不知出此其初輕敵而欲速成功悉驅巡尉深擣巢穴則為所敗其後賊以虜掠致師官軍追之墮其計中則又敗自兩失利之後士氣不振統兵者有怯敵之心悉聚浙兵屯於青溪距賊巢穴者六十里先遣保甲營木寨掘壕塹然後進師一旦為賊所乘向之木寨適足以為火攻之資弓矢不及施器械不及用束手受戮一掃而盡賊氣既銳莫之沮遏遂焚青溪諸邑以及睦州其



後又破富陽諸邑敗官軍於陸和寺設疑兵自江乘潮而下統兵者悉衆捍之賊由山徑擣虛以入遂陷錢塘此則浙兵措置失律之過也黥歙距賊巢穴八十里屯兵數千以捍賊衝適守臣憲司移易罷去舊者旣去官新者未到任雖有將兵莫相統一賊衆出沒虜掠村落去郡十數里間視之恬然莫有與之敵者一旦卒然逼郡城姦細為之內應兵火四起乃始出鬪已無及矣夫以去賊巢穴之近而自賊作以來曾不為城壁壕塹守

禦之具至使陵踐如入無人之境諸邑靡然皆為所破  
此則黥歙豫備不嚴之過也夫歙睦錢塘者東南劇郡  
生齒衆多財賦充衍士大夫之淵藪也狂賊乘間而作  
不旬月而陷兩州一督府縣邑以十數無辜之民橫被  
屠戮官司府庫皆為掩有士大夫之家碎於賊手而姦  
惡無賴之徒雜然從之自為得計兇焰寢熾江浙為之  
震動可不為之痛憤哉伏以國家承平之久東南之民  
習於治安不識兵革垂二百年郡縣弛備率無城郭將

不知兵兵不知戰是以狂賊竊發官兵疲懦望風奔北  
居民遷徙莫有固心官吏往往亦為遯逃之計無足怪  
者然東南者天下之腹心也江浙者又東南之腹心也  
歙睦錢塘者又江浙之腹心也國家以養兵為重而養  
之之具金繒穀粟轉江通漕盡在東南由歙以之瀕江  
諸郡不數百里由杭睦以跨浙東西亦不數百里旬月  
以來又不知其變動如何良可寒心得不為之深計而  
早慮哉為今之計破賊之策大槩有三一曰審地勢二

曰遣重兵三曰擇良帥江東地勢近賊巢穴莫便於宣  
二浙地勢近賊巢穴莫便於杭杭雖為賊所陷然傳聞  
淮甸之師繼至賊已棄城而去設使不去亦當力爭命  
帥屯兵於二郡因利乘便收復睦歙使賊還保巢穴不  
敢放肆然後殄滅可期若夫散兵他郡地遠而力分未  
見其利此必審地勢之策也江浙之兵屢為賊敗士氣  
凋索不可復用其勢必起兵他路及遣畿甸之師以臨  
之一以張軍勢二以安民心三以沮賊氣惟遣兵多則

見功速雖暫有所費不得而惜此必遣重兵之策也國朝以來號為劇賊者儂智高之於邕王則之於貝耳當時帥師以破智高者則狄武襄公青文潞公彥博也二公者威信素著故能節制將士使之用命破賊於旬月之間今方寇悖亂僭逆殘陷州縣又非智高則之比自非選用曾任邊帥素有威名方略之人付以兵柄未易成功此擇良帥之策也得良帥總重兵以臨要地又當許其便宜從事不從中制摧鋒陷陣者信賞犇亡敗衄

者必誅料敵制勝以蕩覆其巢穴然後賊可指日而平也又有不可緩者江浙之間頻年水旱民力凋耗加以狂賊竊發州縣追呼騷擾不勝其困宜下寬大之詔凡鄰賊州縣科率調度不急之務一切權罷積欠逋負權行倚閣出禁帑截上供錢穀以給軍資使民曉然知朝廷德澤策無先於此者夫天下猶之一身瘡痍即吾之肌肉也盜賊即吾之民也民愚無知初雖脅從陷以所欲貨財可掠而有婦女可虜而得仇怨可起而報平日

束於法而不敢為者皆公然得為之無怪其徒之浸多而樂為之用也善治瘡痍者毋使浸淫善制盜賊者毋使滋蔓滋蔓難圖皆起於忽之以為不足慮此不可不察也恭惟相公仰被聖天子之所眷倚俯為四海之所具瞻獨秉鈞衡之初狂賊偶發適當是時然則安宗社福生靈立太平之基者當自破此賊始幸望留意毋忽夫通天下之志者莫如言方今世故豈可一二指陳惟通言路使人之得盡其心而畢其說是者從之非者置

之而不加罪衆志畢陳可以不勞而成天下功況於盜賊何足翦滅哉必欲通天下之言願自某此書始亦嘗致書執政與此互見伏惟變調之暇試取觀之有可以裨廟堂之未議者竊冀不以人廢言也干冒威嚴無任惶恐戰越之至某頓首再拜

上門下白侍郎書

宣和三年正月日某頓首再拜門下侍郎閣下某竊以東南習於治安之久兵民不知金革之事郡縣初無城



池之守狂賊竊發擾吾腹心有不可不慮者而某罪戾之跡幸蒙赦宥歸自閩中道出江浙詢聞甚詳思慮至熟敢私布于左右以備採擇之萬一方寇者本狂愚無知之人傳習妖教假神奇以惑衆遂謀僭逆然有狡獪姦人爲之輔翼悉假古人名號以自隱莫知其爲誰何憑負險阻脅誘烏合亡命之徒建號改年妄相稱諭其初不過劫掠村落運致資糧倔強巢穴以苟歲月耳偶值浙兵措置失宜屢戰屢北賊遂猖獗某在饒信親見

探報觀其行兵狙詐百出侮官軍於掌股之上竊意未  
易制禦不旬月間果陷歙睦錢塘焚蕩縣邑以十數江  
浙為之騷動此豈可不為之慮而猶以常寇待之哉譬  
猶火燎于原必絕其道乃可撲滅今賊勢鴟張兇焰浸  
熾憑陵州縣如入無人之境莫有沮遏之者其勢必擇  
良帥遣重兵以據要害之地運籌決勝折其角牙制其  
奔逸收復所陷州縣使賊畏縮退保巢穴兩路併力鋤  
其根原則撲滅之期自可指日而定也要害之地江東

莫如宣兩浙莫如杭杭雖為賊所陷傳聞淮甸之兵繼至賊已棄城而去設使不去亦當力爭命帥遣兵以據宣則江東諸郡皆有所恃而進可以取歙命帥遣兵以據杭則兩浙諸郡皆有所恃而進可以取睦得歙睦則賊之巢穴可俯而窺矣夫有兵而無帥與無兵同有帥而無節制與無帥同方今江浙之兵率皆挫衄不可復用必煩朝廷以虎符起畿甸及他路之兵以臨之然不為之擇威信素著曉兵事有方略者為之帥則遣兵雖

多未必有所補也或以謂盜賊竊發不足命帥則國朝  
以來劇賊如儂智高王則不過據一郡當時命帥以討  
之者狄武襄公青文潞公彥博也矧今方寇悖逆僭亂  
攻陷州縣殺掠兵民聲勢又非二賊之比豈委任一二  
監司郡守不知兵者所能殄滅哉誠得良帥總重兵許  
以便宜從事節制嚴而號令明江浙合勢如首尾之相  
應將士協力如臂指之相使信賞必誅以作士氣而摧  
賊鋒左剪右屠轉戰逐北則此賊不足平也朝廷立賞

格以捕賊每名若干此止可以得小盜耳今方寇兇徒以鉅萬計所陷州縣府庫倉廩民間物力悉皆掩有財足以聚衆力足以使人恐未易以立賞捕也為今之策莫若用邊賞之法除渠魁及為之輔而有名號者重賞以構之外自餘一切計首虜以受功以陷陣克敵敢鬪者為上則將士勸矣賊以區區脅從烏合之衆而能敗官軍陷州縣者以其敢殺戮忘生而不畏死也吾之將士率皆欲全軀而保妻子以謂與賊鬪者必死而臨敵

遯逃者可生雖有堅甲利兵安能使之破賊哉為今之策莫若一以軍法從事逗撓奔北者必誅使之進與賊鬪猶有生理退而遯逃有死無赦以首爭首以力搏力而人自為戰則賊可破矣誅賞者驅將士於矢石用命戮力之大柄誠得良帥而付之雖懦夫疲卒且將化為精銳矣此不可不察也恭惟朝廷畱意西北所以折衝禦侮者甚備然自今觀之西北不足憂而江浙為可慮何哉西北高城深池樓櫓相望強將悍卒習於戰陣卒

然戎狄驚邊徼靡封疆吾有以待之未足為深患也故  
自西鄙用師以來夏人每傾國入寇者屢矣曷嘗有失  
郡縣之患哉江浙治安垂二百年州縣苟且城池弛備  
百姓閑逸官兵偷惰目不識旌旗之色耳不聞金鼓之  
音一旦狂賊竊發望風奔潰名郡劇邑談笑取之萬有  
一浸淫滋蔓歷時愈久其勢必貽朝廷東顧之憂可不  
為之深慮哉伏望門下侍郎以一方生靈為念因進對  
間詳以此聞所謂賊不可忽而命帥遣兵據要害以圖

進討不可緩者使狂悖之寇勦殄有期東南之民安堵  
無患天下不勝幸甚某庸陋不材素荷知遇敢緣國事輒  
布腹心以裨廟筭之萬一亦嘗致書宰執與此互見幸  
試取而觀之恕其狂諄于冒威嚴無任惶懼戰越之至  
某頓首再拜



梁谿集卷一百八